

Dekano nobo di Órden di Abogado Karel Frielink:

PROSESO ESTATAL UN DESAROYO IMPORTANTE PA ORDEN DI ABOGADO

WILLEMSTAD – Órden di Abogado no solamente ta un organisashon ku ta salbuardiá e profeshon di abogasia, pero ta un organisashon ku un di su puntonan di mas prinsipal ta salbuardiá tambe e estado di derecho. Den e konteksto aki e Dekano nobo di Órden di Abogado ta di opinion ku e Órden mester haña mas partisipashon den e proseso di struktura Estatal.

Djabièrnè siman pasá durante e reunion di miembronan di Órden di Abogado a elegí abogado mr. Karel Frielink komo Dekano nobo di e Órden. Frielink ta remplasá abogado mr. Eric de Vries. E otro miembronan di direktiva a keda meskos kual ta abogadonan mr. Eric Bokkes, tesorero; mr. Daniel Zahavi, sekretario i mr. Chester Peterson, Vise Dekano. Banda di e echo ku Órden di Abogado tei pa salbuardiá e interesnan di abogado, Órden su empeño ta pa yega tambe na un mihó funshonamentu di e sistema di derecho i pa medio di informashon pone énfasis riba e derecho di demokrasia.



Mr. Karel Frielink a kuminsá su karera komo abogado na Amsterdam na aña 1989 i na aña 1997 a biaha pa Kòrsou. Aktualmente Karel ta partner di Spigthoff Advocaten. Banda di esaki e ta miembro di direktiva di Kámara di Komersio, Miembro di Hunta di Supervishon di Citro i ta dosente na UNA.

Den e kuadro aki tambe Órden mas ku nunca ántes ke ta mas embolbí den e proseso di struktura estatal.

Un otro aspekto ku e Dekano nobo ta mira dilanti ku hopi entusiasmo ta introdukshon di edukashon obligatorio pa abogadonan. Den futuro tur abogado tur aña ta obligá di sigui algun kurso.